



SUD BIH Denis Tabaković i Igor Lečić priznali krivicu



Uhapšeni u akciji „Osoje“

Dilerima iz Čapljine 42 mjeseca zatvora

Sudsko vijeće prihvatilo sporazume o priznanju krivice koji su optuženi sklopili sa Tužilaštvom Bosne i Hercegovine. Drogu rasparčavali po BiH, ali i Hrvatskoj

Vijeće za organizovani kriminal, privredni kriminal i korupciju Suda BiH, kojim je predsjedavala sutkinja Amela Huskić, izreklo je jučer presudu kojom su Denis Tabaković (36) i Igor Lečić (38), obojica iz Čapljine, osuđeni na ukupno tri i po godine zatvora zbog organizovanog kriminala u vezi sa neovlaštenom proizvodnjom i stavljanjem u promet opojnih droga. Tabaković je tako osuđen na dvije godine i šest mjeseci zatvora, u koji će mu biti uračunato vrijeme koje je proveo u pritvoru, i to od 19. septembra do 13. novembra 2013. godine, dok je Lečiću izrečena kazna od godinu zatvora.

Presretnuti razgovori

Presuda je izrečena nakon što je Sudsko vijeće jučer razmatralo i prihvatilo sporazume o priznanju krivice, koje su optuženi sklopili sa Tužilaštvom BiH, a čijim potpisivanjem su u potpunosti priznali da su počinili krivična djela koja im se stavljaju na teret.

Tabaković i Lečić su tako proglašeni krivim što su se, kao članovi organizovane kriminalne grupe, kojom je rukovodio Adis Burić, u periodu od aprila do septembra 2013. godine, bavili preprodajom

heroina i kokaina.

Kako se, između ostalog navodi u presudi, Tabaković je, po prethodnom dogovoru, od Burića i još jedne osobe kontinuirano kupovao drogu, i to po jedan kilogram i 30 grama heroina i 30 grama kokaina. Drogu je kupovao na unaprijed dogovorenim lokacijama u Mostaru i Čapljini, a zatim bi je dalje prodavao Lečiću i Slađanu Dragičeviću iz Čapljine. Lečić i Dragičević bi kupljenu drogu dalje rasparčavali konzumentima na području BiH, ali i Hrvatske.

Kako je jučer kazala tužiteljica Dijana Kajmaković, Tužilaštvo BiH je istragu u ovom slučaju provodilo u saradnji sa pravosudnim i policijskim agencijama Hrvatske, čime je

ostvarena značajna međunarodna saradnja. Nad članovima ove grupe provedene su posebne istražne radnje, te je većina saznanja prikupljena na osnovu presretnutih razgovora. Utvrđeno je da je riječ o dobro organizovanoj kriminalnoj grupi u kojoj se tačno znalo ko je lider, a ostali članovi su imali tačno podijeljene uloge.

Akcija „Osoje“

Tužiteljica Kajmaković je naglasila da smatra da će se visinom kazne postići svrha kažnjavanja, te da je prilikom predlaganja kazne uzeto u obzir što je Tabaković već ranije osuđivan za isto krivično djelo. Naglasila je i da je Lečić u međuvremenu hapšen, jer mu je pronađena plantaža indijske

konoplje, o čemu istragu provodi Tužilaštvo HNK, ali da misli da će mu ova presuda biti dobra opomena, te da je u obzir uzeta njegova ranija neosuđivanost.

Braniteljica optuženih Suada Halilagić zahvalila se tužiteljici Kajmaković što je Tužilaštvo, i nakon saznanja da je Lečić ponovo uhapšen, ostalo pri ranijem sporazumu. Za obojicu svojih branjenika je istakla da su u teškoj materijalnoj situaciji, te zatražila da budu oslobođeni troškova krivičnog postupka, što je Sud u konačnici i prihvatio.

Ova grupa je, inače, pala u akciji kodnog naziva „Osoje“, koju su pripadnici SIPA-e 19. septembra 2013. godine izveli u Posušju, Mostaru, Čitluku, Širokom Brijegu, Čapljini, Tužli i Sarajevu, gdje je izvršen pretres stanova i vozila na čak 17 lokacija. Pored Tabakovića i Lečića, u optužnici su se našli i Adis Burić iz Mostara, koji je označen kao vođa grupe, te Danko Dragoja, Samir Habibija, Almir Denjo i Valentina Sulić iz Mostara, Petar Bošnjak i Marijo Bošnjak iz Posušja, Edin Arnaudović iz Sarajeva, Slađan Dragičević iz Čapljine, Josip Čuzić iz Širokog Brijega, Mirko Primorac iz Čitluka.

M.M.

VODA SE RANIJE NAGODIO

Burić dobio pet i po godina

Sud BiH je ranije, tačnije 27. augusta ove godine, vođu ove organizovane kriminalne grupe proglasio krivim te osudio na zatvorsku kaznu u trajanju od pet i po godina. Burić je također osuđen na osnovu sporazuma o priznanju krivnje, koji je sklopio sa državnim Tužilaštvom. U presudi je, između ostalog, navedeno da je Burić organizovao grupu koja se bavila međunarodnom preprodajom heroina i kokaina. Nabavljenu drogu su miješali sa drugim supstancama radi povećanja mase, a zatim prepakivali i dalje preprodavali korisnicima u BiH i Hrvatskoj.